

四庫全書

集部

欽定四庫全書

集部

元詩選初集卷十三  
四

詳校官中書 臣 王 鵬

主事銜 臣 徐以坤 覆勘

總校官編修 臣 王燕緒

校對官檢討 臣 溫常綬

謄錄監生 臣 李煥霞

欽定四庫全書

元詩選初集卷十三

庶吉士顧嗣立編

郝信使經

經字伯常澤之陵川人祖天挺遺山元好問嘗  
受學焉經少遭兵亂徙家順天賈元帥輔張蔡  
公柔先後辟為子師有書萬卷恣其搜覽遺山  
嘗謂之曰子狀類乃祖才氣非常勉之遂與論  
作詩作文之法世祖以太弟開藩徵經入見荆

鄂用兵經上書言宋未可取不如修德布澤相時而動憲宗設江淮荆湖南北等處宣撫司命經為副憲宗晏駕會宋賈似道請和世祖自鄂州引兵還即位以經為翰林侍讀學士佩金虎符充國信使齎書入宋通好似道方以鄂圍之解為已功恐經之至而泄其情也拘之真州至元十一年已延南伐乃禮而歸之至燕京病卒年五十三累贈昭文館大學士司徒冀國公謚文

忠伯常之出使也以為南北生靈庶幾有息肩  
之日既而被留於宋者十六年鏑鋤急迫益肆  
力於文章著春秋外傳易外傳太極演原續後  
漢書及陵川文集若干卷延祐五年詔江西行  
省刊行史稱其文豐蔚豪宕詩多奇崛今觀其  
集信然而真州諸作尤極悽惋北還之歲汴中  
民射鴈金明池得繫帛書云霜落風高恣所如  
歸期回首是春初上林天子援弓繳窮海孤臣

有帛書中統十五年九月一日放鴈獲者勿殺  
國信大使郝經書於真州忠勇軍營新館是時  
南北隔絕不知中統之為至元也元人高其節  
以比蘇子卿焉

原古上元學士

麟死九鼎淪萬世無孔孟文字糠粃餘扶藉不絕聖伊  
昔大觀季天王始失政中聲入哇淫吾道孰不競金源  
東北來一洗河海淨斯文甚濫觴幾墜土梗橫吳楚割

半天瘡痍僅續命伊洛遽騫騰朱張立朝廷弘肆六藝  
學俾與日月並中原有奇才詞賦方闢釘天門黃金榜  
赫耀動萬姓君臣此為得父師此為令或者語斯文環  
視驚眙瞠孰意元化精不遂入昏暝浚發自蔡黨高步  
出遼夏墨浸天壤深筆埽風雷勁絲綸帝載熙訓誥王  
言瑩諸公繼踵作互執造化柄黃山與黃華雙鳳高躋  
蹬清風玉樹鳴千古一輝映有若閒閒公光彩壁月恒  
雲煙恣揮灑乾坤快歌詠疊疊金聲鏗矯矯銀鉤硬楊

馮李雷麻嶷峒胥倡應五行連麗天四海望而敬偉哉  
遺山老青雲動高興文林剗荆棘翰府開蹊徑秋空玉  
琴張搏拊分雅鄭三閭一曲歌忽喚劉伶醒哀哀汴蔡  
亡六合為懸磬此老獨巍然聲價駭羣聽振袂凌孤霞  
珠壁飛欬磬人宗一代文天賦百年盛紛紛夸毗子相  
撫為訾評自謂人勝天詎知天已定行行野史成共為  
天下慶作噩建子月投我以照乘薜屋驚見斗寒焰忽  
蟠亘經也生已晚弗及拜先正窮閭一束書十載成墮



甌學問苟有歸貧窶安足病今乃得溟渤問津有龜鏡  
挈我登龍門縋我出虎窠搖搖風中旌茲始見依凭緬  
思先世澤於今果無竟嗚呼世道喪欲語寒淚迸何時  
倒銀漢與世開艷艷昂頭冠三山俯瞰旭日晟陸海闢  
文源生民共涵泳

鴈媒

雲衢眇飛鴻往來解隨陽序當夜有所次進朝有行瀚  
海天山西卵育歲為常八月秋風高雖離共南翔水國

足汀洲江湖多稻梁  
晝帶殘蘆老岸青草長  
哀鳴洞庭月亂點瀟湘  
霜太和開冰天北去頑  
穹蒼信禽法天運斷不  
為炎涼偶為篝燈誤縛  
足離江鄉飲啄養為媒  
朋儔總相忘嗷嗷解愁  
人乃反無愁腸戈人見  
冥鴻矰繳潛施張置媒  
使號呼投網來搶攘奄  
忽一舉盡羽毛皆摧戕  
厭然束縛去又向雲間  
望嗟嗟罔民徒詭計不  
可防被獲反為用竭力  
如鬼蜮有信復無智終  
自為身殃誤已更誤人  
不悟真可傷

去三汭見太行

二年大河間，曾次洶餘浪。身與天根浮，決潏隨下上。靈  
槎杳虛舟，顛倒泥底樣。恍疑渾沌初，溟滓天水象。揚鞭  
得西歸，瞠目為一放。舉首見太行，逸翠蜚萬丈。爽朗肝  
膽張，豁達氣宇曠。真宰聳奇骨，頓覺天地壯。茲山自佳  
色，何乃氣彫喪。吾家在椒嶺，老霧橫莽蒼。松楸日樵采，  
山靈亦悽愴。何時鶴髮翁，攜我躋疊嶂。雖無錦繡裏，粗  
著文彩狀。山河表裏全，自古更霸王。於今何索然，死石

徒映向在人不在山先民語無妄行行重行行落日兩  
相忘

遊靈巖寺并序

乙卯秋九月十九日登泰山二十二日下太平頂  
遂遊靈巖寺

岱宗西北馳倒卷碧玉環嶽靈祕雄麗勢欲藏三山初  
從谷口入兩崦爭孱顏漸疑下地底細路深屈盤仰視  
覺天窄石井攢峰巒陸海沙劫開突兀仁王壇桐鯨吼

西風棟宇橫高寒石龍噴清泉灑落几案間修竹埽山  
色瑩綠穿雲根丹鳳饑不來寂莫青琅玕上方在天上  
下視無塵寰空霏鎖霜樹翠錦蒙朱殷西日回清輝輕  
金滿煙鬢何時脫世網挂席高盤桓靜境求初心滯慮  
驅萬端向晚蒼烟合更欲窮躋攀路斷不得前矯首重  
一看

贈青社諸公

北風吹海氛雄鯨偃修鰭皇皇擇木鳥落日將安之清

霜摧豐林枯沙沒卑枝況復天地閉豈汝飛騰時嗷嗷  
復嗷嗷途窮愈多岐寸心增鬱陶拊髀潛生悲蒼茫欲  
問津漫使行人嗤賴有魯連子亦在東海湄舉手謝浮  
世共欲尋安期扶搖三山巔笑傲雲濤低半夜開扶桑  
弄日騰清輝伊昔孔尼父亦欲居九夷世網儻可逃去  
去夫何疑

青州山行

薄遊東諸侯致敬多擁篲訖無安巢木歲晏復反鞞飲

馬南洋橋摩玩米芾記蛟龍郁蟠拏劒戟磔芒刺酌別  
表海亭激豔吸空翠霜風吹鴻鵠草野簇車騎日斜過  
雲門凌跨方半醉垠峒亂葉滑蹭蹬幾欲墜懸巖半逼  
面絕澗黑無地入險難遽止眩運不敢視層崖宿山家  
坐久猶膽悸居民畏馬嘶遊子喜犬吠及遠終夜喧月  
斜人未睡柴闌見星稀枕石餘薜膩酒散身逾困饑透  
食有味忽聞炒椒巔虎去失羸孖陰森木石怪慘冽霜  
露氣黎明轉重崦呀互急幽閤繚繞天一線陷日孤光

細嵌隙深且蒼白晝悲魍魎過午纔得水飲漱解鞍憩  
却是城西河山間更清駛彎環折鱸腸詰曲亂之字跋  
步重跋涉深淺頻揭厲林開見石田數頃牛角銳淳俗  
久深居見人但驚避農婦帛纏頭應門聳高髻破屋有  
邨翁無言但流涕舉鞭為撫摩俾說山中事都因七十  
堠鹵莽各稱帝實戶三百萬食盡猶未弃白骨與山齊  
查牙誰與痊幸得脫齒頰瘡殘餘一臂年來立海州遺  
噍更疲弊邊郡增仇敵深山無子弟聞此不忍聞愴怛



復噉噉海岱稱東秦山河號十二峽口吞穆陵渤海卷  
無棣初從霸國後往往逞兇獫號公死巖邑特制殆非  
計祇為殘民區每起姦雄志窟宅多龍蛇桃源難避世  
數日出修阻川途漸平易雲梢見萊蕪孤城隱霾曠回  
視青萬疊乾坤屹軒輊穿出過徂徠背轉逾汶泗泰山  
正面看益見崇高勢目中好全齊蒯生莫兒戲為告慕  
容超勿謂燕得歲

隨州

山南楚甸圻漢東隨為大盡日涉艱阻極力出險隘川  
途落木杪忽覩天宇快長林偃秋色百雉露茫昧疑向  
遠水曲隱映脩竹外提去不得前橫亘斷崖礙煙深梅  
欲春石亂水相帶飛鳥不知人投樹聲甚怪探騎隔岸  
言轉出西城背火壕削紫土斬絕黑欲墜當時不受攻  
例與安陸潰居人盡室去涵養儘一敗荒空二十年繁  
夥日蕪穢白堊餘屋壁狐狸窟庭內穿窻棗枝曲倚柱  
巖桂壞誰種當道棘亂長侵階菜與室沒蒿萊何處覓

粉黛溼氣雜土腥當晝半暝晦相國來秉鉞下令急翦  
拜佇馬開天荒欲復太平代勿謂少師侈今有季良在

雲夢

羣山避鄢郢霜淨楚天遠秋色浮鴈背風來蘆花滿陂  
澤通江湖田岸藏町疃橫匯淵藪大散漫稻畦淺積煙  
晚翠重老浪虛白卷乾坤入涵混魚龍深宛轉殘嶺土  
崖斷餘浸黑壤輒平岡繚中洲闊甸負長坂勁竹密如  
簣綠粉封紫竒忽向青楓末半出黃櫨峴北人有圖畫

却向此間展選鋒一萬騎掣電鐵滿眼更不顧鹵獲直  
向腹心翦昨去今飲江埽道草盡偃何處仍三戶踐蹂  
殆不免荒莊自池臺寒蔓相挂胃鵝鸛不知家悠悠忘  
還返注目浩無際馳想首重俛何時結茅屋老吟寄殘  
喘濯纓謝漁父暝卧汀沙晚

渡江書所見并序

已未秋奉命宣撫江淮自鄧南入新野蹈宋北  
鄙渡泌河及湖陽入於春陵陂塘聯絡畎澮紫

屬邨墟翳荒空不可行佳木修竹奇花異卉  
櫛比林莽間怵然有感于中而取野蓮荒竹秋  
桐野菊四者姑以寓感焉

野蓮

陂塘渺煙蕪秋波淡浮空蒹葭雜芙蓉依稀見愁紅輕  
銷露華涼亭亭倚西風金粉亦自香霞腴為誰容無言  
恨最深失偶情更濃搖搖似相招為喜詩人逢翻思彼  
桃李反在羅綺中復憶巖下蘭綠葉翳荒叢西子出苧

羅原思老蒿蓬萬物在生處莫漫仇天公

荒竹

荒竹遶廢宅高下隨女蘿新梢入林莽迸葉楊條柯玉  
骨清且癯埋沒還奄阿病綠煙慘悽枯黃雨滂沱劍斷  
戟復折壯士空悲歌伊昔主家安森森氣相摩籜龍起  
雲雷平地煙霄過幽香澹庭除靜陰延綺羅一自兵塵  
生人去斤斧多寂莫秋不實饑鳳將奈何

秋桐

高秋江漢波卉木八搖落荒林擁孤桐蔓草重繞縛淒  
迷氣日喪憔悴若隕箝黃彫晚風吹青裂饑鳥啄無時  
亦無儔幢幢老陰薄儀鳳安所棲宮樹空寂莫謂汝無  
自傷植根亦嬌弱豈能持風寒況乃失所託何時此焉  
居揚鋤翦荒惡攜幼扳庭柯遂我生聚樂

野菊

乾坤入消數萬物呈晚節秋晏菊始華荒叢翳林樾野  
迴幽姿清岡斷寒豔接絲蟲冒青苞啼蜚抱枯葉灑露

積玉華層層擁金屑我欲摘以杯飲之濯中熱霜栽郁  
高標胡與荒穢列嗟爾夷惠傳玉質難變滅不謂無人  
看便使幽香歇安得老瓦盆坐對澆古月

冬至後在儀真館賦詩以贈三伴使

突兀天壤間洞視及八軌區宇入割裂疆場更彼此閨  
怒尋干戈禍亂無期已孰能著手援下石往往是予方  
閉關居不忍安坐視復有弓旌招颺然為時起仁義一  
萬言麻鞋見天子天道本好生天顏亦為喜乃曰哀吾



民去殺兵當弭今日踐阼初急務惟爾耳三人奉書行  
一信盈尺紙詔下癘老泣春風動田里入境及淮孺肺  
臆即開披剝難撤藩垣羅列倒瑚簋萬變惟惴赤一念  
無幸詭白虹晝貫日清江秋見底行人不能行在所輒  
頓止一自入儀真改館七牢美坐使庖丁勞徒增魯連  
恥空庭重咨嗟閤室還徙倚蹉跎兩朝事慘澹一江水  
堂上接玉帛何如四郊壘萬衆七奔命何如一行行李  
陽復生意歲律已窮紀節候中易感挺特入飢骸折梅

愧皇華對酒生顙泚蒼生苟能活志士豈惜死願借君  
懸河發我弦上矢天下本一氣南北只一理處置一何  
難鴻毛扇糠粃中原帝高光遽可遼金比君家祖宗法  
親仁載良史可令富鄭公樹立太平址一若泰山安一  
若九卵累事幾或一失千載貽詬訾中間樂禍徒沮遏  
逞姦宄以為富貴鎡瞰鼎磨血齒高天無風颺側佇羽  
翮侯激怒起兵端馮鋒肆蛇豕皇皇仁聖資比復當謹  
始發言漫盈庭執咎誰敢爾是非在目前胡為眩紅紫

政如道傍室牽制終誤已區區漫多議紙上何足恃出  
門懼垂堂何嘗見邊鄙睽孤還自睽見鬼急張弛一斷  
即遇雨羣疑皆披靡天運屬安治何當合離仇不能鷹  
脫轉還成肉在几盤飧寧忍食欲斷南八指

橄欖

南人謂  
之格覽

南果足韻勝北人罕為奇銀盤獻青子愛玩驚見之蓮  
房飽出蜩棗滑生下枝翠粉苔埽新清烈凝松脂齒牙  
噴艱澀苦硬不可持氣韻久始來靈根淪天池灑然凌

清飈甘露濡仙芝有如宿瘤妻苦節真可期亦如相韓  
休朕瘠天下肥危辭遽逆耳終自為良規先難阻欲速  
後得卒莫違默默心語口此樂夫誰知始覺衆果俗橘  
奴復梨兒海嶺瘴天黑異味翻茶飴雨露存天真颼霧  
不可滋島嶼出乳泉造化亦若茲元氣舌本甜酸苦歸  
涕洟本來甘受和衆味相假移居然復其源偽妄焉能  
欺何當謝世網兀坐忘奔追深山石室空煮石療調餓  
破鼎煎春芽嚼此吟湘纍脩然沃肺肝看山坐支頤物

表有真味載歌采薇詩

秋思四首

星麾重霜露落月窺敝裘久客心易傷況乃逢莫秋誰  
知楚江邊即是窮海頭赤子解虎鬪先拚十二牛太阿  
授楚柄濤塗竟拘囚昊天有肅殺未肯休戈矛書生本  
迂闊國計無身謀俯仰但不愧萬事從悠悠

江聲萬馬來勢欲衝夜枕志士足多感坐起安得寢靜  
聽風雨急透骨寒凜凜湖湘湊遠浸巴蜀動餘淦誰令

限南北汹怒欲相諗落落弭兵心於今成貝錦薦玉期  
捧盤墮甌如拾潘尊中有瓊花明朝且轟飲

木葉墮積水西風白鴈來祗應破月底曾過黃金臺昔  
年弔荆卿臺邊把酒盃落日督亢陂莽蒼秋雲開浩歌  
易水寒晚山青崔嵬誰知坐江館兩見飛鴻回空庭日  
徙倚慘淡生莓苔援溺先墮井計拙良可哀

昔遊東諸侯秋晚登泰山佇立太平頂超然出塵寰日  
觀望吳越浩渺秋雲間長風漾江海天末生微瀾今年

坐舍館江聲滿重關却如在幽陵修阻不得看好花靜  
有色相對婉且閒無由寫哀怨日遶歌幽蘭

儀真館後園海棠兩花千秋因為小酌賦詩

二年海棠秋幽妍對寥索霜後輒載花枯株吐纖弱化  
工為詩人故令造物錯木落出奇芬風度亦不惡尖黃  
簇短葉膩翠光欲鑠廢縮包紅栗殷濃入深萼稀疏生  
意怯靜麗尤綽約飛絲冒青蟲蠨蛸共聯絡深閨養春  
嬌霜華滿珠箔賴得西風輕微薰小陰作盈盈出宮妝

新寒翠綃薄空庭自顏色含恨誰附著息亡楚無言意  
婉心不樂琵琶怨昭陽所遇非所託獨有未歸人相看  
慰孤酌却似海南時坡仙政漂泊有酒仍有花世事且  
高閣後時亦何遲適寓今猶昨香霧霑新橙傾酒兩螯  
嚼銀燭更高燒秋花易零落

甲子歲後園秋色四首

雞冠

夷則播新律卉木協秋候綰結流火餘的皪金天宿裁



我列庭除摘摘儼雄秀炎帝朝火官絳憤軒宇宙植立  
竟不拜離披擁青袖奕葉初類莧吐心漸如豆脈絡引  
絲起一片珊瑚瘦雲芝茁紅腴紫茵卷翠脰碎顆蹙丹  
砂肉綻股血透怒割赤龍耳勁磔還亂糝麻葉薄且聳  
山字缺乃覆查牙欲成角擁腫下連珠生全餘小穗展  
盡帶殘皺昂藏偃膺高突兀出羣驟還將早霞映欲向  
朝日睂月露終夜棲風雨幾回鬪再礪復自止交退誰  
與救區區閒草花象物與接構弭兵日觀戰亦是自貽

咎垂簾且相忘高枕卧清晝

牽牛

野花照天星星中花亦盛長夏蔓草深疎籬掩斜徑幽  
庭日無事森寂澹相映繚繞絲亂垂點綴葉相並金風  
一披拂零露光彩競參差碧玉簪綰插滑欲迸霜絲吐  
冰同容色好娟淨堂陰青錦張牆背紫苔瑩時方鵲橋  
成佳節當秋孟織女能剪裁天河洗尤稱女以秋為期  
郎將花作證風雨開雲屏鸞鳳鏘月鏡處處乞巧是家

家喜相慶五年江館客萬事成墮甌不能致龍節空自  
悲虎穿永日鑒炎蒸中暑甘卧病對花淚盈目坐起不  
覺暝雲漢見雙星回頭看斗柄遙憐小兒女昏嫁俱未  
竟中流虞風波相見何日更

葡萄

深院荒草長短蔓裂塼縫葡萄本西果南國誰與種插  
蘆為扶持灌溉甚珍重瘦骨紫節舒龍頭青線控蟠蟠  
上疎籬蒨蒨將遠縱遭遇雖後時取實望秋仲摘露添

俎豆庶閒館人供誰知六月旱卉木焦死衆斷秧餘幾  
花強勉著土擁竟作纏結枯日遶空悼痛肺渴口重乾  
望梅心欲烘忽憶河隴秋滿地無歇空支離半空架串  
草十里洞拇乳積成岸頽癢接梁棟一派瑪瑙漿傾注  
百千甕往歲見沙陀回鶻正來貢詔賜琥珀心雪盛瓶  
盡凍查牙飲流漸氣壓黑馬湮一旦離魏闕五載猶在  
宋見此復何時烏道目逆送

野夢

富池蓮蒲短久旱餘淺淤牆隈積餘埃玉鳳秋不翥野  
蓼根莖堅幸得侵沮如節葉瘦且赤蘼蕪交翠箸細蕊  
亦鮮潔粉米糲丹素獨窳裊輕穗離披滴清露水花澹  
晚色幽官足真趣忽憶過夢澤千里渺煙樹蘆花與蓼  
花露錦蕩雪絮深入芙蕖藪遠映蒹葭渡舉鞭問飛鴻  
駐馬嚼佳句乃今四壁中浩渺隔煙霧日斜對幽叢聊  
以慰遲莫大似辛苦蟲無復風標鷺來因援沈溺底事  
極幽錮屢上剗腸書無地瀝血訴嗟嗟好花草焉用生

金匱要略卷之三  
卷十三  
此處祇因為詩人故故獨不去嘗膽如啖蔗食蓼猶饌  
御仰首但有天志節久愈著

幽思六首

江山鬱幽思靜止有天光宛然褰薄帷明月照我牀蟋  
蟀鳴孤根鴻鴈頽飛霜惄惄動羈衷耿耿發清狂有萬  
來無端百折縈回腸晤言且伏枕一寐成兩忘

鷺凰者丹霜尺鷃搶枯株知止各翱翔卑高一何殊精  
衛苦填海冤憤一何愚鴈鳩不為巢亦自有所居偉哉

衡門士高卧一束書曲肱有餘樂不用長者車

濯纓厭世塵入海求夜光貝闕涵珠宮異色森綺芒采  
采滿懷袖駕龍登扶桑赤鳥驚上天火曜舒乾陽回視  
乃瓦礫自媿空犇忙書生莫漫愚敝帚安足藏

有物莫不由萬古長安道區區往來者總向塵中老年  
年雨灑清日日風驅埽行人竟無迹涸轍生秋草我欲  
謝帝闔離居事幽討束載無良辰幾回問蒼昊

藏舟泰山巔偶值懷襄流忽從歸墟東直向西海頭洗

日復濯月光抱空中樓扶疎散青紅異氣纏九州忽焉  
閣寒沙佇立令人愁明朝早潮來欲住不得留

景晏念慮歇支頤坐看山起來復何為結佩紉幽蘭萬  
事從悠悠不媿俯仰間舉杯謝塵世月落梅花殘深山

總風波天淡孤鳥閒氣數當閉塞我亦方閉關

此題本  
六十首

特就其警拔者錄之又和陶詩二卷以其於本意不合  
不載伯常用韻於入聲任意出入如北風一首云憤叱  
一氣轉大呼天地窄婦來長城隍卷起黑山磧雲飛月  
縮豔日落天失色長歌葉落柯笑擲千金瑩甚有奇氣  
惜全首多  
失韻也



白溝行

西風易水長城道老寧宣牙馬頻倒岸淺橋橫路欲平  
重向荒寒問遺老易水南邊是白溝北人為界海東頭  
石郎作帝從珂敗便割燕雲十六州世宗恰得關南死  
點檢陳橋作天子漢兒不復見中原當日禍基元在此  
溝上殘城有遺堞歲歲遼人來把截酒酣踏背上馬行  
彎弧更射溝南月孫男北渡不敢看道君一向何曾還  
誰知二百年冤孽移在江淮蜀漢間歲久河乾骨仍滿

流禍無窮都不管晉家日月豈能長當時歷數從頭短  
日莫途窮更著鞭百年遺恨入荒煙九原重怨桑維翰  
五季邾知魯仲連只向河東作留守奉詔移官亦何疚  
稱臣呼父古所無萬古君臣有遺臭

賢臺行

古黃金臺也土人稱為賢臺

高臺突兀燕山碧黃金泥多土猶濕曉日曛曛赤羽旗  
燕王北面親前席費盡黃金臺始成一朝拜隗人盡驚  
誰知平地幾層土中有全齊七十城禮賢復讎燕始霸

遂與諸侯雄並駕七百年來不用兵一戰轟然駭天下  
二城未了昭王殂火牛突出騎劫誅臺上黃金少顏色  
惠王空讀樂毅書古來燕趙多奇士用舍中間定興廢  
還聞趙括代廉頗敗國亡家等兒戲燕子城南知幾年  
臺平樹老漫荒煙莫言騏驎能千里祇重黃金不重賢

天賜夫人詞

八月十五雙星會佳婦佳兒好昏對玉波冷浸芙蓉城  
花月搖光照金翠黑風當筵滅紅燭一朶仙桃降天外

梁家有子是新郎  
芊氏忽從鍾建背  
負來燈下驚鬼物  
雲鬢敲斜倒冠佩  
四肢紅玉軟無力  
夢斷春閨半酣醉  
須臾舉目視傍人  
衣服不同言語異  
自說成都五千里  
恍惚不知來此際  
玉容寂莫小山顰  
俛首無言兩行淚  
甘心與作梁家婦  
詔起高門勝天賜  
幾年夫壻作相公  
滿眼兒孫盡朝貴  
須知伉儷有緣分  
富者莫求貧莫棄  
望夫山頭更賦白  
頭吟要作夫妻豈  
天意君看符氏與  
薄姬關繫數朝天子事

湖水來

枯風怒遏長川迴兩湖五月生黃埃水晶宮碎洲渚出  
昆明老火飛狂灰魚龍錯落半生死乾坤枯槁無雲雷  
海鯨怒抉海眼破濤頭一箭湖水來新聲汨汨入黑壤  
寒虹矯矯收蒼靄鷗鳥靜盡波不起澄清無瑕玉鏡開  
浮光四動青雲第倒影半浸黃金臺何當乘興呼太白  
權歌長入琉璃堆滿船明月露花冷翠綃銀管飛瓊盃

聽角行

贈漢上趙丈仁甫

疎星澹不芒破月冷無色千年塞下曲忽向窻中得當  
空勁作六龍嘶四海一聲天地寂長呼渺渺振長風引  
起浮雲却無力此聲誰謂非惡聲借問何人有長策漢  
家有客北海北節毛落盡頭毛白聽此空令雙淚垂中  
原鴈斷無消息南枝越鳥莫驚飛牢落天涯永相失江  
上舊梅花今夜落誰家樓頭有恨知何事牽住青空幾  
縷霞

懷素素帝闕將二帖歌

青布高垂誇美酒醉僧扶書賒幾斗朝朝挂向長安市  
行人看書不飲酒唐家既滅酒家亡青帘草聖千載後  
瀚海西邊唐將鬪將軍揮戈虜連穀當時本自說戰功  
却使醉僧誇好手筆勢更比青帘雄常山長蛇救尾首  
賈侯愛玩看不休不肯插向萬卷樓壁間一雙岳湛壁  
灑落神俊懸清秋見我酒酣使題評快飲數鍾澆枯喉  
為說草書秦漢間變出楷隸蓋有由但存妙處遺土苴  
縱筆自如成鎖鉤大巧既窮出大拙作者每向無心求

所以顛張醉素嗜酒能出奇放浪縱恣隘九州天矯騰  
蛟龍峻利森戈矛婀娜春樹花肅颺秋江鷗兔起復鶻  
落雲行溪水流神聚精不散挾怪還撐幽都非有意舉  
自然所以超凡入聖直與造化侔陶然以酒寓天趣一  
著直在最上頭莫言只作醉僧圖君未得醉方隱憂一  
身纏縛萬古愁焉能浩浩復悠悠侯乃大笑言君更飲  
數甌壁間又添珠一斛三帖使我子孫收

趙邈齋伏虎圖行



南山射虎曾得名壁上忽見令我驚何物敢爾來戶庭  
屢叱不動仍生獍畫師前身是山靈胃中有虎無丹青  
老櫺數筆平埽成殺氣慘淡猛氣橫頭顱半妥蹲孤城  
怒尾倒插蟠霜旌鐵鬚張礫疑有聲赤吻瀝血猶帶腥  
抱石欲卧伏欲騰爪入石角瞠不瞑寒電夾鏡騫雨晴  
四座凜凜陰風生威稜神采出典刑邈齷乃是金天精  
伊昔詩家杜少陵酷愛賦馬并賦鷹為憐神俊故屢稱  
我今賦虎亦有徵要得猛士建太平坐令四海皆澄清

吁嗟擲筆還撫膺世間道路多棘荆  
張鬼磨牙不可行  
緯亢行

歲臨鶉火斗插子穉陽欲復老陰死  
朱靈南極元龜首  
望舒北至明堂裏乾坤翻覆變已窮  
氣數朝元將有啟  
旄頭日沒正當中五緯將且躔  
蒼龍羣陰已伏衆星沒  
玄天變白生清風兩角在南大角北  
龍頭半妥朝上官  
誰知總向亢中聚同舍參差不同度  
歲鎮熒惑共光明  
金水煌煌俱不怒東西絡繹似連珠  
色正芒寒共昭布

往年長星埽金源前年孛入紫微垣欖槍妖客不時出  
天狗枉矢還驚傳今朝太平有此象不久再見成康年  
昔時曾聞入房駟兆啟金商六百祀同來東井漢元年  
四百年中稱帝制後來丁卯煥文章二百餘年方季世  
曾逢丙午當百六今日重逢又重六五星忽來會辰前  
不知誰禍誰為福網紀梁棟兩攝提招搖玄戈動光輝  
馬祖直欲飲亢池星翁歷史休相欺正是君臣會合時

丙午冬十有一月越十有五日辛未五星會于亢太陽  
躔斗十九度太陰經心五度木星躔亢二度八十三分

十杪在辰前逆行六日行一度土星躔亢宿一度三分  
在辰前順疾十日半行一度金星躔亢一度六十四分  
四十六杪在辰前順疾一日行一度火星在亢東五度  
六十二分半在辰前順疾二日行一度水星躔亢三度  
三十二分三十杪在辰前順疾一日行一  
度以其五緯皆躔于亢故謂之緯亢云

### 唐十臣像歌

魏徵李太白郭子儀渾瑊顏真卿韓愈白居易牛僧孺崔渙司空圖

鄭公山立面粟黃袖中隱隱露諫章致君堯舜肩禹湯  
太宗一鏡今不亡謫仙翩然來帝鄉淋漓龍巾倚御牀  
斗酒百篇錦繡腸光焰至今萬丈長汾陽沈雄異姓王  
中興功業冠有唐人臣始終壽且昌深山大澤龍蛇藏

咸寧氣貌慘不揚殺氣凜凜橫天狼回天再造忠且強  
功名端不讓汾陽太師魯公日角方挺特不撓百鍊鋼  
端笏正朝貌堂堂盧杞藍面不敢望昌黎高冠何昂昂  
泰山北斗元氣傍天衢搖曳雲錦裳斥去老佛擅文章  
樂天翛然世相忘江水蕩漾江花香不作房杜庸何傷  
歌詩直與日月光奇章重厚國棟梁亂來粗能立紀綱  
太平無象稱小康不計黨禍深膏肓崔相憂國眉兩厖  
區別流品何太忙天子閉目猶自防曹節侯覽不可量

司空表聖空賢良清癯不欲游巖廊詩外有味誰肯嘗  
寡鶴飛去高翔翔

宣和內人圖

牡丹橫壓搔頭玉眼尾秋江翦寒綠金翠冠梳抹且肩  
正是宣和舊妝束腰肢一搦不勝衣當時宜瘦不宜肥  
三千想見無顏色偏有親題御製詩蔡攸恢復燕山府  
曾索君王不曾許蕭條萬里去中原偶見花枝淚如雨  
却將換米向三韓遂令流落在人間道君一顧曾傾國

今日休作等閒看

入燕行

南風綠盡燕南草一桁青山翠如埽  
驪珠晝擘滄海門王氣夜塞居庸道  
魚龍萬里入都會瀕洞合沓何擾擾  
黃金臺邊布衣客拊髀激歎肝膽裂  
塵埃滿面人不識骯髒偃蹇虹蜺結  
九原喚起燕太子一尊快與澆明月  
英雄豈以成敗論千古志士推奇節  
荆卿雖云事不就氣壓咸陽與俱滅  
何如石晉割燕雲呼人作父為人臣

偷生一時快一已遂使王氣南北分天王幾度作降主  
禍亂衮衮開其源誰能倒挽析津水與洗當時晉人恥  
崑崙直上尋田疇漠漠丹霄跨箕尾

跋魯公送劉太冲序帖

魯公筆法皆正筆出奇獨有劉太冲初從真草入行草  
削去畦町尤清雄懸針數筆皆側鋒徃徃矯矯如飛龍  
輪囷權奇恣揮灑瑰偉乃見烈士風觀此好向書家道  
未有能真不能草



楷木杖笏行 并序

金源以來進士登第例授楷笏無則以槐代之今  
曲阜祖庭有孔道輔釋褐時擊蛇笏殷血猶在橫  
絡一綫旁迸數砂粒色若棗漆以水濯洗則其色  
鮮紅如新濺著者今此笏乃其尺度故制也孔氏  
族人又以長材為杖以贈好事者乙卯秋九月經  
拜謁墳林家長翁以笏杖各十相貽故為賦此

兩楹夢斷壞梁木天出斯文生宰木翳雲擁霧二十里

虎踞龍蟠泰山足道德仁義為根株禮樂枝葉光扶疎  
此蔭百代吾道尊戶有絃誦家詩書中間楊墨常蠹食  
重欲剪伐逢老釋崔嵬枯幹尚生意千古堂堂孟韓力  
年來旦旦加斧斤幹為屑楔枝為薪知音抱去甚泣玉  
觀者掩面如悲麟大橫庚庚紫蛇腹手板霑恩照緋綵  
老儒扶藉見聖人豈並枯藤與桃竹斯文將墜吾道亡  
不絕一綫甚濫觴豈為區區徇枯木亦如告朔存餼羊  
孔氏家庭手植檜楷樹相望閱千世亂來秦火幾番燒

土黑灰寒共憔悴靈光殿基秋草深牧童相喚穿墳林  
青蛙亂聒顏氏井饑鳥落日號白禽佩玉長裾新進士  
回視詩書等閒事赭袍白馬飛將軍闔劒長槍不識字  
中原慘慘無神靈白骨蔽野無蒼生只知下石誰手援  
老大有淚洪河傾皇極厄會數流血誰與澄清倒溟渤  
摩挲東家扣脛杖拂拭囊中擊蛇笏會當立聖蠲祿昏  
鞭擊魚龍起春窟

乙卯秋月十九日登泰山太平頂

窮秋老雨四十日坤軸欲爛陰霾纏我來方作泰山游  
玉虹一夜收雲煙山靈奕奕生喜色突兀撐裂青羅天  
輕裾飄飄過黃峴乘興直到三峰前霜餘灌木出秋色  
萬疊紅錦幪椒巔泓澄寒溜浸太古翠壁細瀉珠璣圓  
當時秦漢極侈麗未必如此皆天然天門中斷兩屹立  
箭筈一磴蛇蜿蜒凌層絕頂肆崇峻佇立矯首望八埏  
長天沈沈入西極九州却在東海邊衝風慘淡萬里來  
海窟勁刮鯢鯨涎須臾白雲生嶽麓脚底決莽無山川

秦壇周觀覺浮動滿地覆冒兜羅絛忽疑山移入海中  
白浪四洶虛濤掀山陰瑰詭光怪出赤氣翠暈相鉤連  
下從谷底上碧落寶塔萬級高蟠旋遂登日觀叱日馭  
六龍倒著珊瑚鞭玉鱗剝落金甲折九芒迸綺生血鮮  
三山搖蕩海水沸蓬壺縹緲來飛仙為言此色與此界  
君自固有非塵緣恍然記悟復無語把手一笑三千年  
華不注行

崑崙山巔半峰碧海風吹落猶帶濕意氣不欲隨羣山

獨倚青空迴然立平地拔起驚孱顏劒氣勁插青雲間  
濟南名泉七十二會為一水來浸山我來方作鯨川遊  
玉臺公子邀同舟君山浮嵐洞庭晚小孤滴翠清江秋  
酒酣興極煙霏昏魚龍慘淡迴山根少陵不來謫仙死  
舉杯更欲招其魂魂兮不來天亦老元氣崔嵬山自好  
超超絕頂凌長風注目東溟望蓬島

居庸行

驚風吹沙莫天黃死焰燎日橫天狼峴峴鐵穴六十里

塞口一噴來冰霜導騎局脊銜尾前羶車輾輾半側箱  
彈箏峽道水復凍居庸關頭是羊腸橫拉恒代西太行  
倒卷渤海東扶桑幽都却在南口南截斷北陸萬古彊  
當時金源帝中華建瓴形勢臨八方誰知末年亂紀綱  
不使崇慶如明昌陰山火起飛蟄龍背負斗極開洪荒  
直將尺箠定天下疋馬到處皆吾疆百年一債老虎走  
室怒市色還猖狂遽令逆血灑玉殿六宮飲泣無天王  
清夷門折黑風吼賊臣一夜掣鎖降北王淀裏骨成山

官軍城上不敢望更獻監牧四十萬舉國南渡尤倉皇  
中原無人不足取高歌曳落歸帝鄉但留一旅時往來  
不過數歲終滅亡潼關不守國無民便作龜茲能久長  
汴梁無用築子城試看昌州三道牆

懷來醉歌

胡姬蟠頭臉如玉一撒青金腰線綠當門舉酒喚客嘗  
俊入雙眸聳秋鶻白雲亂卷賓鐵文臘香一噴紅染脣  
據鞍側韉半淋鬣春風滿面不肯嗔繫馬門前折殘柳



玉液和林送官酒二十五絃裝百寶一派冰泉落纖手  
須臾高歌半酡顏貂裘潑盡不覺寒誰道雪花大如席  
舉鞭已過雞鳴山

化城行

東郊野馬如馬驚依稀隱約還成城參差雉堞雲間橫  
鰲頭岌業擎長鯨壯哉三都與兩京殿閣樓觀顏空明  
丹雘峭麗敲且傾煙氣荏苒搖旆旌其中似有百萬兵  
是邪非邪寂無聲秦邪漢邪杳難名長風忽來一掃清

赤日如血高天青霜淨沙乾鴈驚鳴路傍但見棘與荆  
祇有慘淡萬古情人間城郭幾廢興一杯聚散皆化城  
君不見始皇萬里防胡城人土並築頑如冰屈丐按劍  
將土蒸堅能礪刀草不生神愁鬼哭枯血腥殺人盈城  
著死爭只今安在與地平平地深谷為丘陵江南善守  
鐵瓮城城外有田不敢耕西北廣莫無一城控弦百萬  
長橫行身為心城屋身城一朝破壞俱化升佇立感化  
參玄冥乾坤翻覆一化城

趙州石橋

輪囷太古綠玉月半插水面不挂天一砭一段數十丈  
大業至今七百年深銜密帟無罅隙嵌磨妥帖堅且圓  
仰視壓面勢飛動勁欲拔起疑墜顛鬼工神力古未有  
地維欲絕還鉤連蛟龍辟易泮水伏細紋參錯如新鐫  
晴虹不散結元氣海捧縹緲纏飛煙衝風倒景鯉背搖  
金瀾滉漾青環偏乾坤壯觀全趙雄幾回笑殺秦人鞭  
往來細讀張相碑直與北嶽相輕軒先君有詩不忍看

摩挲華表空泣然

閒閒畫像

王安  
仁藏

烏巾鶴髮鳶雙肩丹砂喫面深兩顴存神垂老孰與傳  
正大八九天興前金源一代一坡仙金鑾玉堂三十年  
泰山北斗斯文權道有師法學有淵中華命脈屹不偏  
楚妃正色絕纖妍石光玉潔無腥羶高文大冊職所專  
潤色帝業星霓纏體制妥帖開坤乾官樣奧雅春容篇  
筆力壯浪傾源泉草聖肆意揮雲煙晚年遊戲西域禪

月江卷盡藤蘿涎清風修修易一編每欲杖屨尋伊川  
熒惑犯昂光竟天不與亡國天惜賢始終無嫌獨巍然  
國初學士汴與燕世章蔡黨方騰騫宣政佻靡快濯前  
補完太朴無雕鐫卿雲腴霞鳳鸞翩貝闕寶府珠璧聯  
崇極欲圯龍步遷此老始終元氣全大儒巖廊筆如椽  
六鼇一掣三山連紀羸墮地誰續絃破觚頓脰皆沈縣  
東塗西抹競取憐夸紅姹紫十百千安得起公重著鞭

萬古一日當天懸

德陵嘗賜公所服丹潮紅滿面公先  
壬辰之變以禮部尚書翰林學士丞

欽定四庫全書

元詩選初集

卷十三

三

旨辛於第人  
以為天幸

元詩選初集卷十三

欽定四庫全書

元詩選初集卷十四

庶吉士顧嗣立編

曉登昆陽故城

弓刀蹀躞西風鳴慘淡夜入昆陽城疎星牢落楚氛黑  
立馬起坐東方明凌晨歷覽增壯觀世祖凜凜猶如生  
以寡敵衆古亦有以怯為勇夫誰能始知謹厚是真勇  
彼偽不足當吾誠眼中百萬已破碎著手一戰成中興  
天定豈容人復勝新莽猶然事符命漢家王氣滿咸陽

空向漸臺看斗柄憑高落落生壯懷萬里一片青山來  
子陵不屈亦堪惜乃使耿鄧升雲臺東都制度遂狹陋  
王室陵夷寢傾覆漫將風節與維持終入曹瞞莫能救  
巖巖高節固可奇濟時行道胡不為釣魚臺上秋風老  
我欲與子論襟期蕭蕭草木南陽道龍虎春陵氣仍好  
須當策杖向軍門整頓乾坤濟時了

巴陵女子行

并序

己未秋九月王師渡江大帥拔都及萬戶解成



等自鄂渚以一軍覘上流遂圍岳岳潰入於洞  
庭俘其遺民以歸節婦巴陵女子韓希孟誓不  
辱於兵書詩衣帛以見意赴江流以死其詩悲  
婉激切辭意壯烈有古義士未到者今并其詩  
錄於左方嗚呼宋有天下文治三百年其德澤  
龐厚膏於肌膚藏於骨髓民知以義為守不為  
偷生一時計其培植也厚故其持藉也堅乃知  
以義為國者人必以義歸之故希孟一女子而

義烈如是彼振纓束髮曳裾我冠名曰丈夫而  
誦書學道以天下自任一旦臨死生之際操履  
云為必大有以異於希孟矣余既高希孟之節  
且悲其志作巴陵女子行以申其志云

北來諸軍飛渡江突騎一夜滿岳陽樓頭火起入閭巷  
曹逃偶走如牛羊巴陵女子尚書婦生平不識門前路  
亂兵驅出勢倉皇夫壻翁姑在何處吞聲掩淚行且嘯  
嘯痕沾濕越羅衣此身忍使人再辱裂帛暗寫臨終詩

上言社稷安危事下說投江誓天志一回宛轉一悲辛  
心折魂飛不成字詩成淚盡赴江流蛾眉蕭颯天為愁  
芙蓉零亂入秋水玉骨直葬青海頭古來烈婦纔一二  
誰似巴陵更文理名與長江萬里流丞相魏公還不死

巴陵女子韓希孟魏公五世孫嫁與賈尚書男瓊為  
婦岳州破被虜之明日以衣帛書詩願好事君子相  
傳知吾宋家有守節者其詩云宋未有天下堅正臣  
禮兼開國百戰功每陳唯雄整及其侍幼主臣心常  
炯炯帝曰卿北伐山戎今有警死狗莫擊尾此行當  
繫頸即日陛辭行盡敵心欲逞陳橋兵忽變不得守  
算穎禪讓法堯舜民亦普安靜有國三百年仁義道  
馳騁未改祖宗法天何賜太青細思天地理中有幸

不幸天果喪中原大似裂冠社君誠不獨活臣實無  
魏邠失人與得人垂誠常耿耿江南無謝安漢北有  
王猛所以戎馬來飛渡巴陵境大江限南北今此一  
舴艋本期固封守誰知如畫餅烈火燎崑岡不辨金  
與礦妾本良家子性僻守孤梗嫁與尚書兒含香署  
蘭省直以才德合不弃宿瘤瘰癧初結合歡帶誓比日  
月晒駕鵞會雙飛比目願長並豈期金石節化作桑  
榆景苑頭勢正然蚩尤氣先屏不意風馬牛復此逸  
鄢郢一方遭劫虜六族死俄頃退鷁落迅風孤鷺弔  
空影簪堅折白玉瓶沈斷青綆死路定冥冥憂心常  
炳炳妾心堅不移改邑不改井我本瑚璉器安肯作  
溺血志節匪轉石氣噓如吞鯁不作燭火然願為死  
灰冷舍生念麴蛾乞憐羞虎穿借此清江水葬我全  
首領皇天如有知定許血面請願魂化精衛填海使  
成嶺

武昌詞三首

并序

王師圍鄂遊騎於金牛鎮得一婦人欲侵之厲聲  
曰我夫壻翁姑皆死目前未即死又可受辱邪速  
與我死遂置之自稱梅溪主人張素英作歌詩數  
篇以見志尋以疾卒於湖中得一路分妻一日以  
無夫選賜有功軍人即以掌批其頰對今上大呼  
曰妾夫將千五百人扼敵沅州妾命婦也豈可辱  
於是乞速賜死上矜其志賜之衣糧使有司存恤

之以俟其夫亦尋以疾卒又有漢陽教授之妻  
為一兵所掠義不受辱投於沙湖三人者僕親  
見之皆可附希孟之義各為賦詞以寓意焉

巴陵女子韓希孟梅溪主人張素英解作歌詩還死節  
不論傾國與傾城

烏鬼山頭鬧鼓聲武昌恭人攜孺兒黃鬚回鶻便批頰  
義感萬乘真英奇

漢陽宣教是妾夫妾身未死緣事姑騎士朝來強擁去

抱石半夜投沙湖

使宋過濟南宴北渚亭

往年薄遊宴渚亭高秋霜落波光清今年持節又來宴  
菱葉荷花香半城城南倒插泰山脚城北沈涵海氣橫  
周圍盡浸樓臺影魚鳥慣聞簫鼓聲錦堂流出珍珠冷  
花底漂搖碎光炯名泉多在府第中繡簾深掩懸脂井  
推波委濤到北渚匯蓄涵渟數十頃虹去聲橋桁柳平分  
破巨壑雲莊入煙暝濟南名士多老成行臺突兀皆名

卿尊中正有李北海坐上寧無杜少陵  
堰頭臘瓮滿船來歌舞要送行人行  
江南風景已不殊渚亭即是西湖亭

三汊北城月榭翫月醉歌

大河奔放千里一片黃鰲頭傑觀突起河中央  
露華漲冷濯桂窟氛露洗盡豁四旁  
濤山隱映生金輪水天不辨渾金光  
杳然坐我月宮上星斗錯還雲錦裳  
玉虹高挂飲酒海黃流倒卷都淋浪  
兩行美人列嫦娥翠綃深



夜冰肌涼悄然清唱多怨曲攪亂羈思為停觴輕颺忽  
來四座覺浮動吹落桂子颯颯生秋香急令撾鼓歌慷  
慨驪龍掀舞白鳳翔玉牀插天抱孤月醉卧萬里銀河  
長

望京府賞紅梅

汴梁宮中絳綃梅移向汴河堤上栽青條團栝杏花顚  
瑣細向陽才半開張公小隊呼我飲風色偃髯寒氣凜  
玉銜徑踏黃河冰貂帽颯簷掀紫錦金鞍細馬歌舞人

雪壓小橋不動塵  
入門下馬簇花宴  
紅蓮舊府花正新  
玉川金波碧香酒  
折花遍插分素手  
春透寒梢未全綻  
風流正要臙脂瘦  
賞梅不用歌落梅  
緩歌却著銀笙催  
愛香細擷生霞蕊  
浮動雲腴嚼一杯  
本是前邨冷澹花  
不稱王侯將相家  
明朝會散更向明  
月底藉雪凍吟踈  
影裏

青城行

壞山壓城殺氣黑  
一夜京城忽流血  
弓刀合沓滿掖庭

妃主喧呼總狼籍驅出宮門不敢哭血淚滿面無人色  
戴樓門外是青城匍匐赴死誰敢停百年涵育儘塗地  
死霧不散昏青冥英府親賢端可憐白首隨例亦就刑  
最苦愛王家兩族二十餘年不曾出朝朝點數到堂前  
每向官司求米肉男哥女妹自夫婦覩面相看冤更酷  
一旦開門見天日推入行間便誅戮當時築城為郊祀  
却與皇家作東市天興初年靖康末國破家亡酷相似  
君取他人既如此今朝亦是尋常事君不見二百萬家

族盡赤八十里城皆瓦礫白骨更比青城多遺民獨向  
王孫泣禍本骨肉相殘賊大臣蔽君尤壅塞至今行人  
不歎承天門行人但嗟濠利宅城荒國滅猶有十仞牆  
牆頭密市生鐵棘

陵川集詩叙金亡事最詳又有金源十節士歌序云  
金源氏播遷以來至于國亡得節義之士王剛忠公  
等十人皆死事死國有古烈士之風可以興起未俗  
振作貪懦其名宇官階始終行業自有良史其大節  
之獄獄磊磊在人耳目雖耕夫販婦牛童馬走共能  
稱道者作歌以歌之庶幾揄揚激烈由其音節見其  
風采云天興諸臣國亡無史不能具官故皆祇以當  
世所稱者如郭蝦蟆仲德行院等書之俟國史之出

當為釐正云十節士謂王子明移刺都郭蝦蟆合谷  
平章陳和尚馬烏古孫道原仲德行院絳山奉御李  
豐亭李  
伯淵也

靈泉行二首 并序

乙卯秋八月及行臺嚴公獵於東山遂會於鳳  
山之靈泉故賦二詩

赤雲夾日騰清暉太陰殺氣纏海電元戎小隊數百騎  
金鑣玉勒紅牙旗長鞭一點陣偃月哨騎兩合前山圍  
查牙折角獲捷虎模糊生血禽孤羆霜蹴剝落落澗石

饑燕亂掠秋草飛應弦霹靂疊破碎掇拾馬皆纍纍  
一川錯莫半山赭空穴破冢妖狐悲將軍推仁亦中怛  
弛弓服矢收神威力士下馬各數獲從官解劔稱酒卮  
山河慘淡生壯觀乾坤突兀增雄奇溶溶喜色動歸路  
滿城樓觀重煙霏

蕭蕭弓劔秋山行老玉破碎前相迎石蛇繞徑入煙樹  
一天忽在青山層三岳鼎峙勢欲墜元氣突兀彊拄撐  
相君坐定從官列游子乘興窮其登穿雲石磴上方遠

忽入洞窟行幽冥黑風吹衣出大隧泉源湛徹光泚清  
脩然濺弄曾次豁一旬流盡千年醒憑高悠悠肆遐矚  
天宇曠闊秋毫明秦山西來忽中斷翳翳桑土西南平  
須臾撾鼓震虛谷尊酒坐嘯還同傾醉歌扣碎一明月  
欲入碧海騎長鯨

八月十五夜五河口觀月

去年燕南醉明月黃金臺上秋風發兩行燕玉笑姮娥  
直著風神比顏色前年山南醉明月露氣風聲纏玉節

甲士撾鼓邊聲雄漢水波翻峴山裂今年又作江南行  
五河河口澆雄鱷舉杯對月月浮動酒浪搖碧金鱗生  
彷徨四顧天宇豁九州四海一月明誰令此地限南北  
關起禍亂挈甲兵人生大抵隨所遇南北東西無定住  
今宵對月傾金尊便可長吟嚼佳句醉時抱月凌孤風  
桂苑煙霄快高步浩歌亂扣白玉盤天上人驚亦何懼  
不須槌碎黃鶴樓何必翻倒鸚鵡洲大江江頭呼李白  
我欲與汝蓬山遊赤城城頭搖曳紫綺裘白雲雲邊倒



卷蒼玉甌雙成佐酒飛瓊唱不解人間更有愁

書磨崖碑後

并序

書至於顏魯公魯公之書又至於中興頌故為  
書家規矩準繩之大匠河朔嘗見三數本皆完  
好而森森如劍戟有不可犯之色今得此本頗  
為殘缺既裝褙則反得古中韻勝乃知崖角刻  
敝本真全露有李白所謂秋水出芙蓉天然去  
雕飾者尤可賞激也乃為賦詩云

汝南昔曾謁公祠霜日暘列森英姿乃今江館坐牢落  
奪目忽覩中興碑神明煥若還舊觀義烈凜凜生見之  
滯氣激起天宇豁快意發冢揮金鉞生平每為二賢惜  
以技掩節公義之不阿桓溫止殷浩遺世脫屣終遊嬉  
平原突兀杲卿死李唐中葉公能持政令二賢書不工  
隻字片楮猶當奇矧於超出二王筆冠冕百代書家師  
坡仙論書至公止此本於公又奇至正筆篆玉藏李斯  
出筆存鋒兼漢隸古硬陵轢瘞鶴銘韻勝韜挾蘭亭記

離堆雄峻僅能亞畫贊沈深還櫛比書法至此為絕塵  
頓覺諸家異端異恢宏正大極道緊馳驚剛方窮壯麗  
萬古千秋討賊心二十四城忠義氣惜哉歲久頗殘缺  
苔蝕潮春寢磨滅去國幾年似者希滄海遺珠亦奇絕  
酒酣對酌虎賁郎況乃摩挲是明月斷畫斬斬屹斷金  
倔彊常山筆端舌中間剝泐尚含胡慘淡中丞面餘鱗  
載看激裂壯士肝意苦時危將泣血置書勿論撫膺歎  
更有何人似公節忠貞端不負巡遠文字尤令重元結

只今誰識段文昌世上焉知李希烈終南太華皆可磨  
後人竟莫墮嵯峨惟餘浯溪青天一片石照耀遼古馳  
江河誰能與世見此不朽業蕩攘邪穢蠲祲疴再立元  
氣壚澆訛踵武至德肩元和九原起公吾其歌

江梅行

江城畫角吹吳霜破月著水天昏黃波澄煙妥林影澹  
雙梅帶雪橫溪塘此時承平風物盛家家種玉栽琳琅  
朝來伴使宴江館銀瓶亂插吹銀管霏微香霧入紅袖

零亂春雲遶金盃都將和氣變荒寒錦瑟愁生燕玉煖  
為言儀真梅最多苔花古樹深煙蘿一年十月至二月  
紅紅白白盈江沱自從天馬飲江水草根齧盡梅無柯  
揚子人家楚三戶今年幸有燒殘樹忽聞星使議和來  
盡貯筠籠待供具從今江梅好顏色爛醉長吟嚼佳句

江聲行

鴈唳月落揚子城東風送潮江有聲乾坤洶洶欲浮動  
窻戶凜凜陰寒生昆陽百萬力一蹴齊呼合譟接短兵

鐵騎突起觸不周金山無根小孤傾起來看雨天星稀  
疑有萬壑霜松鳴又如暴雨鬱未發暗鳴水底號鯢鯨  
祗應靈均與子胥沈恨鬱怒猶難平更有萬古戰死骨  
銜冤飲泣秋濤驚虛庭徙倚夜向晨重門擊柝無人行  
三年江邊不見江聽此感激尤傷情須臾上江帆欲舉  
舟子喧豗開撾鼓江聲漸小聽雞聲慘淡芙蓉落疎雨  
後聽角行 并序

丁未冬十有一月漢上趙先生仁甫宿於余家

之蜩殼菴霜清月冷角聲寥亮乃作聽角行以  
贈其行近在儀真每聞角聲因思向來卒章四  
句江上舊梅花今夜落誰家樓頭有恨知何事  
牽住青空幾縷霞便有江城羈留之兆故作後  
聽角行以自釋云

燕南壯士江城客孤館無眠心已折那堪夜夜聞角聲  
怨曲悲涼更幽咽一噴牽殘楊柳風五更吹落梅花月  
霜天裂却浮雲散鴈行斷盡疎星接餘音眇眇渡江去

依稀似向愁人說，勸君且莫多歎嗟。家人恨殺生離別，  
可憐辛苦為誰來。彫盡朱顏頭半白，萬緒千端都上心。  
一寸肝腸能幾截，當時聽角送南人。南人吹角不送人，  
不如睡著東風惡。拍枕江聲總不聞。

長星行

甲子歲七月一日始  
見九月十六日沒

銀槩萬條日沒酉，玉虹千丈月合丑。雄雞一聲半天赤，  
太陽欲出星在柳。東北勢安裁冰刀，東北迸開驅雪帚。  
行侵熒惑掩太白，直從北斗向南斗。上相黯慘忽無色，



上將參差都不守明堂帝坐總茫昧房駟王良欲奔走  
漸過興鬼漫兩河渾埽三垣當井口突煙滾滾欲浮動  
異事驚人古未有初從曠早忽風雨拔木轟山聲亂吼  
爾後妖芒忽亘天七月初吉又踰九縱橫凌犯卧復堅  
自莫至朝長更久五年江館戴片天變故紛紜翻覆手  
摧心褫魄又見此閉目不敢窺戶牖天傾地裂由積釁  
敗國亡家皆自取吾聞有道必得壽長星勸汝一杯酒

狼牆歎

危牆閣峻倒插棘四簷抵市無罅隙東日曬透西日炙  
周興鐵瓮熾火逼置予此中不許出虐哉狠牆甚狠石  
嗚呼何時見天日

冤鐫歎

重門重鎖禁不開伴使送入不復來鐵簧生澀深金苔  
沴氣纏結埋陰霾竄中進食當門回咬脣閉目猶疑猜  
嗚呼冤鐫孰為哀

憶寶刀歌

生平知己壓腕刀借交報仇燕南豪一從濠梁成隔絕  
梟獍觸忤狐狸嗥夜夜斗牛多異氣玉虹縈天光燭地  
幾回夢裏飛入手痛惜當年都廢棄近來館下遇家賊  
空拳無奈徒忿激撼牀一夜寶刀鳴黑風卷地吹霹靂  
只今使節猶未回祇應玉琤生青苔何時磊落却在手  
為我討賊除氛埃

陽春怨二首

江頭怕見楊柳春楊花飛來愁殺人紅顏落盡花片新

黃昏無人淚霑巾舊花被疊凝春塵夢中忽見渾未真  
隔花半面春山顰恨郎不歸多怨嗔不知兩處同苦辛  
同是天涯愁恨人幾年心事向誰說花落鶯啼晝掩門  
芳草萋萋春又青階前院後喚愁生隔牆飛花帶鶯聲  
都因無情却有情強飲不醉愁難醒欲睡不著夢難成  
一簾斜日堆綠英春風澹沲江無聲楊花茫茫揚子城  
總是天涯流落情夜來說殺梁間燕一世春愁在此行

秋興五首

風振長天秋氣豪  
幽人興與雪山高  
霜纏短褐歌商頌  
月滿空庭讀楚騷  
萬事已應隨敝俗  
一身寧忍墮塵牢  
會須散髮滄溟上  
鞭擊魚龍舞碧濤

世事雖窮道不窮  
金聲猶振魯王宮  
看書極探天人理  
下筆全侔造化功  
未灑後塵心有贄  
忽驚前哲坐生風  
六經依舊垂天地  
千載秦灰散劫空

沙冷雲平塞外天  
霜風掣箭射幽燕  
羣狐蹀血濡腥尾  
一鷗搏空弄老拳  
白玉樓成賀安在  
黃金臺廢隗猶賢

翩翩精衛休填海驅石秦人已斷鞭

永夜漫漫苦飯牛北溟誰下釣鰲鉤拘雲琢句鬼神泣  
倚劍長歌天地愁日暖桃源秦世外月明蘭國楚江頭  
但能握節終吾事絕食猶輕漢五侯

萬里長風埽陣雲浩歌一曲倒清尊昔人猶有未埋骨  
遂世難招不返魂陰沴豈能昏日月濁河難使貫乾坤  
皇天不許中州靜夜夜長庚出薊門

雲意

陽谷初冰冽曉靈瑤花一夕滿瑤臺雲飛海嶽寒難吐  
風振堪輿凍不開秀魄暗成冰井月冷魂潛入楚江梅  
梁園此日多豪俊濯濯無因展異才

呈王內翰

霜落雲枯秋盡時翰林遺得桂林枝春風久已歸桃李  
劫火從渠照虎貌白髮操戈浮世在赤心傾蓋幾人知  
壺中有酒無天地醉後休歌貝錦詩

送董巨源

錯落霜華季子裘茫茫何處是西周乾坤破碎無元氣  
歲月蹉跎漫客愁舉世橫身歸虎口幾人懷策射龍頭  
相逢不得從容地空著長歌慰遠遊

老馬

百戰歸來力不任消磨神駿老駸駸垂頭自惜千金骨  
伏櫪仍存萬里心歲月淹延官路杳風塵荏苒塞垣深  
短歌聲斷銀壺缺常記當年烈士吟

題楊之美尚書寄王運使守太原書後



憶昔風塵暗雨京北門此日賴真卿乾坤翻覆見忠節  
臣子危亡置死生一柱數年支大厦孤軍千里重長城  
尺書便是中丞傳讀者猶能感義聲

南堂即事

長夏禪房絕點埃鬱蒸襟袖迴然開半軒流水移天去  
滿榻雄風送雨來不記閒愁千萬種有時清唱兩三杯  
輕鷗也自知人意浮入驚波却便回

大宛二馬

天廐所有詔  
賜張蔡公

二馬飄飄萬里來  
玉花蕭颯上金臺  
風生兩耳雲霄近  
電掣雙瞳日月開  
渥水虎文連殺氣  
宛龍種絕氛埃  
將軍正欲成勲業  
看汝驍騰展驪才

落花

彩雲紅雨暗長門  
翡翠枝餘萼綠痕  
桃李東風蝴蝶夢  
關山明月杜鵑魂  
玉闌煙冷空千樹  
金谷香銷漫一尊  
狼籍滿庭君莫埽  
且留春色到黃昏

次韻荅王國範

薄寒孤影澹黃昏步出空齋自掩門霜落池萍清見底  
風彫庭樹靜歸根天高鴈去人千里江闊烏驚月一痕  
兩國音塵俱斷絕幾年懷抱與誰論

贈馬德璘

從君躍馬入長途尊酒風雲日便疎白壁暗投皆若此  
赤心知己更誰歟不能北闕紆奇策甘向南山守敝廬  
抱膝長吟意蕭索半生孤負五車書

靜香亭二首

南風吹綠滿庭槐門巷脩然絕點埃紅玉生煙塵世隔  
錦幃遮日洞天開鶯知好客飛無語蝶為新花去復來  
好著生前無限酒浩歌長醉亂霞堆

小山曲檻映迴廊別有一天深處藏人物風流還似晉  
衣冠儒雅尚如唐四圍紅錦春風軟滿地綠陰清晝長

坐久杳然忘世味碧雲高興欲飛揚

燕自兩河之戰遂非唐有薦羅遠金

幾四百年然而不漸宣政佻靡之化豪勁任俠渾厚敦雅猶有唐之遺風焉故是詩有衣冠儒雅尚如唐之句

曉渡澧河

旌旗斷續出林巒  
部曲喧騰過石灘  
殘月沒時愁地險  
宿雲收處覺天寬  
自知不武還為將  
漫使閒身也屬官  
落盡黃榆秋色老  
楚山清曉石樓寒

營獨山谷

秋風獵獵建牙旗  
月澹昏黃馬不嘶  
區脫定時林影黑  
邏兵行處草聲低  
豺狼遠跡終宵遁  
烏鵲驚飛到曉啼  
中夜幾回還自惜  
缺壺歌罷意淒迷

孟少保後園瑞香

羽葆層層擁細花  
甲梅斜映隔山茶  
兩三叢裏氤氲氣  
數百年來富貴家  
雕玉香濃圍瑞雪  
翠翹春暖插輕霞  
主人一去無消息  
庭戶蕭疎落晚鴉

又咏山茶云秦樹  
怨離拋翡翠漢宮

愁絕冷臙脂  
內家最愛常留  
得生色屏風有  
數枝亦甚佳

題汶陽王太師彥章廟

不許乾坤屬李唐  
孤軍直與決存亡  
大梁僅得延三日  
匹馬猶能敵五王  
誰意人間有馮道  
幸因身後遇歐陽  
千年豹死留皮在  
破冢風雲繞鐵槍

宿州夜雨

飛電穿窻滿室光，却從陟黑見昏黃。  
雷霆半夜翻龍窟，風雨終宵撼客牀。  
塞上詩懷尤索寞，天涯壯氣獨昂藏。  
星麾何日平康了，兩國長令似一王。

震南樓

危樓雄壓楚氛收，緩帶輕裘日燕遊。  
赤羽萬夫開虎幕，黃流一曲枕鰲頭。  
天高樹老關河莫，水落雲枯澤國秋。  
此地誰教限南北，蒼茫極目使人愁。

沙洲夜泊

一來駐泊便淹旬  
洲渚人家鴈鶩邨  
滿地月明疑白晝  
半帆煙影易黃昏  
天連平楚無邊闊  
河入長淮徹底渾  
夷甫諸人憑寄語  
莫教石勒上東門

月丹

小艇移來江漲橋  
盤盤矮矮格仍嬌  
丹霞皺月瑤紅玉  
香霧凝春翦絳綃  
一種是花偏富貴  
三冬無物比妖嬈  
廣寒記憶曾攀折  
滿殿光搖照紫霄

王承宣致月丹一本云山茶大者曰



月丹又大者曰照  
殿紅故為賦此

伴使秦文舉欲入維揚故賦詩以見意

東風吹落瓊花雨  
南浦潛生荔子煙  
夜久有懷聞獨鶴  
春歸無語怨啼鵑  
天沈海底涵金鎖  
日隱鰲頭頓玉鞭  
千尺絲綸萬年井  
文園消渴竟誰憐

芍藥

王承宣送揚  
州芍藥數本

夜來風雨洗殘春  
芍藥還開春又新  
入座忽驚持酒客  
舉杯先酌送花人  
煙輕雪膩丰容質  
露重霞香婀娜身

鐵石肝腸總銷鑠都將軟語說風神

生朝祭先有感

金橘堆盤荔子丹瓊花滿奠熟沈山風生香案空遙拜  
月掩重門尚未還目斷松楸心耿耿氣填胸臆淚潸潸  
三冬又盡三年數兩國無成兩鬢斑

鏡薌亭

薄薄輕雲似霧塵陰陰江氣冷侵人一庭芳草留連客  
兩樹夭桃斷送春檻外流鶯仍語巧梁間旅燕又巢新

東城飲伴西湖柳寒食中間入夢頻

甲子秋懷

江館無家久似家西風院落老天涯黃纏薯蕷猶多葉  
綠擁芙蓉尚未花紗幕墜塵歸晚燕窗池生草窟秋蛙  
枯腸欲斷誰濡沫擊柝聲中夜煮茶

己巳三月二十六日

夢遊故國人仍獨春到空梁燕自雙雲淡星疎祇見斗  
浪平風定不聞江五更鼓角纏孤枕千里關河入破窗

金少卿集卷十四  
落盡好花春又老依然塵土暗金杠

升賢邨

兩嶺青林夾孤山黑石圍雲攜疎雨過風約斷虹飛為  
告奸雄叟難逃筆削譏荒邨好終老白首竟忘歸

開平新宮五十韻

日月旋天蓋星辰合斗樞光騰掌內鐵氣繞澤中蒲金  
帛羞重賜弓刀奮一呼真人翔瀚上天馬出余吾尺箠  
初開闢羣雄競走趨無勞為更舉乘勝即長驅蹴踏千

年雪驍騰萬里駒長城衝忽斷弱水飲先枯肅殺威靈  
盛驅除運會俱華夷塵瀕洞天地血模糊地盡諸蕃外  
兵窮兩海隅九州皆瓦礫萬國一榛蕪誰與重休息徒  
為妄駭吁治平須化日殺伐豈良圖聖子曾當璧神孫  
會握符鐵山深蘊玉瀚海特生珠歷數終當在謳歌信  
不誣欲成仁義俗先定帝王都畿甸臨中國河山擁奧  
區燕雲雄地勢遼碣壯天衢峻嶺蟠沙磧重門限扼狐  
侵淫冠帶近參錯土風殊翠擁和龍柳黃飛盛樂榆岐

山鳴鶩鶩冀野牧駟駢風入松杉勁霜涵水草腴穹廬  
罷遷徙區脫省勤劬階土遵堯典卑宮協禹謨既能避  
風雨何用飾金朱棟宇雄新造城隍屹力扶建瓴增壯  
觀定鼎見規模五讓登皇極羣生賜大酺還聞却走馬  
即見弛威弧簡策詢前代弓旌聘老儒恢弘回一氣微  
幸絕多途雷雨施龐澤乾坤洗舊汙直為提赤子遂使  
出洪鑪遠檄收疲繭窮邊罷轉輸江壖遺鄂岳石窟棄  
巴渝刀槩存殘骨膏粱換毒痛却令逢有道免使叫無

辜契闊還同室，鯁得字孤八荒，皆壽域六合極歡娛。  
白叟休垂泣，蒼生獲再蘇。只知期用夏，更擬論平吳。旭  
日冰天透，仁君雪國無。終能到周漢，亦足致唐虞。遇主  
得知已，逢時合舍軀。弭兵通信誓，奉詔敢踟躕。頓覺心  
田豁，還將肝紙刻行行。重回首，瑞氣滿闔閭。

春夜

春雨江湖夜，東風花柳寒。舉頭不見日，何處是長安。歲  
月纏星節，乾坤遶血盤。控拳紛愈甚，排難古來難。

儀真館中暑一百韻

五載淹江館三年錯雨暘熱中蒸滯氣涸轍斷枯腸黑  
井鹽煎火紅鑪鐵鍊鋼悍懜加誕罔坎窞觸機張直壯  
無身慊窮堅著命當鼻煙從燎炬溝汗儘翻漿噎塞難  
通七摧頽懶揭裳沾濡粘弊屣毒螫上空牀甌擁輪困  
肉瓶熬臙沸湯噉喘氣尤偃叫吼怒如狂曉瘴煤生柱  
晴靈土抹牆片雲遮日薄疎雨灑晴忙熒惑凝青血長  
庚迸赤芒槁天高破碎乾月死昏黃翕煬渾無露萎焦



似有霜燕呀棲不壘鳶跼墮難翔雷殷轟蚊塔沙生闇  
戩槍飛螢空自爍戰蟻竟深藏盤礴摧腰脊低垂塌目  
睚本來觀化日誰使過愆陽風土聞南國江山異朔方  
豈期惟酷烈無處別炎涼故國包全晉吾家壓太行高  
寒雄地勢瀟灑靜雲莊六月衣冠冷千年草木香長松  
撼潮海絕壁隱虛堂却到燕山北行歌易水傍鴈霜彫  
夏木鳩雨潤春桑聘幣輝光重徵車道路長沙陀瞻帝  
里雪谷拜天王的噪星街凍嚴凝日隱光羣雄奮冰窟

六合入彙囊半世無蒸濕於今重禍殃襟裾堆蚤虱肘  
腋沸蜩蟪豈免泥塗辱還令羽翮戕甘言雖未已毒手  
益難量夾柵仍規覘重圍更限防塹門深虎圈擊柝開  
魚榔箝逼鑪錘密枝梧甯吻荒釜鬻烹則易刀俎食非  
強氣數俱臻極天人盡反常旱災繇歲月禍本入膏肓  
重怒非長策佳兵甚不祥擲揄肆嚴阻鄙外極戎羌信  
誓猶然在明徵固未妨但令心匪石儘自口如簧喟歎  
愁仍積吁嗟氣不揚行人竟何罪國體豈無傷反已私

尤責知微實愧惶逢時當際會援溺止懷襄自縛懸難  
解輸人律否臧惡心煨肺腹畏景急炮塘欲掘陰山鼠  
翻思雪窖羊履危從蹇剝挺節不低昂伊昔當崇慶金  
源復靖康白虹纏帝座紫電激天狼傳說騎箕尾王良  
策駟房一龍轟霹靂萬馬快騰驤歷塊無完國蜚鋒舉  
斷吭纔聞過燕趙又已出河湟此際通和好惟時正擾  
攘渾如沃薪火大似堰流糠狼籍三峰敗顛連五國亡  
濟師攻汴蔡徽節到餘杭海上盟空閣城南事渺茫劒

關開要害淮海失城隍  
寓縣餘骸骨乾坤一痛瘡  
百年血肉運萬里戰爭場  
邊將傲功賞兵人藉糗糧  
居然忘厄會但請復侵疆  
虎怒寧須激鯨吞更請嘗  
肌膏坐銷鑠節鉞漫熒煌  
破屋渾生亂方畦孰插秧  
薜蘿沒洲渚潢潦漫陂塘  
莽蒼人何在陰森鬼正俵  
鴈兵秋滾滾魚窟夜遑遑  
豈忍仍擠石無為更藥瘍  
欃槍關三紀絲枲素千箱  
已亂仁明出中興祚胤昌  
勝殘須必世奕葉始呈芳  
秦府鳳鱗質周家金玉相  
河山收殺氣雲漢煥文

章潛邸人皆仰春宮德益彰厭兵符太母歸馬勸先皇  
禮樂尊周孔聲名慕漢唐恢弘張治具突兀振乾綱駿  
發渝平急鋪敦大命將奉書祇局脊馳驛敢彷徨加額  
人皆賀摩肩衆所望只今全父子無復痛孤孀延入拘  
管壘周羅巾廡廊只將人桎梏不用鐵銀鐙龍節埋泥  
穿狐涎汨土甌焚身無取齒避竈豈爭煬炎赫惟加熾  
風飈不許涼祇愁化灰燼何處薦珪璋天問終無語冥  
搜未易詳艱屯果誰敢壞亂實難匡有賦誇鸚鵡無媒

獻驕驕何當快風雨吹去卧滄浪

三月二十三日猶在儀真館二首

向晚日華紫殷然轟夜雷龍蛇開蟄窟桃李動春臺淚  
逐催花雨心同潑火灰何由復龍動百感坐中來

二月還如夏炎蒸鬱震驚迅雷侵骨冷飛電透心明海  
氣霑衾濕江聲拍枕平從今休禁火一雨萬家生

是月初二

日火二十日丑刻火午刻復火一月凡三  
火獨遺舍館及漕臺州治在故有是句

月夜感懷

去國期星歲無家阻萬金江山沈苦思花月動哀吟  
變故空長策蹉跎惜此心遙憐燈火罷兒女夜愁深

雨中感懷

舍館年年老江邊日日陰雨聲便熟睡花氣動幽吟  
樹密鴛愁濕庭荒雀畏深晚風吹鼓角慙媿弭兵心

曉起

傍枕衾稠薄還家夢亦難月華終夜白江氣先秋寒  
心苦天為碎辭窮海欲乾起來看北斗何日見長安

江雲

江雲似江水渺渺復粼粼  
晝靄無窮態紆餘不盡春  
遮回斷行鴈望殺未歸人  
何日星轅路馮高更憶親

新館感春二首

東風吹敝褐水氣撲虛簷  
月窟星河澹江城鼓角嚴  
年深愁不醒春至恨猶添  
為問秦通守何顏說錦簾

佇立無人語巡簷思慘然  
夜江寒浸月春樹暝生煙  
計拙仍持節途窮擬問天  
難為繞指鐵萬折志彌堅



新館夜聞杜鵑

嗁落深江月催殘故國春不堪多恨鳥偏聒未歸人血  
盡腸應斷哀餘心更頻關心尤入耳一枕夜愁新

癸酉閏六月十三日夜病中聞笛

深夜涼風發迢迢送笛聲只愁江月破不放野雲行怨  
曲人多感離腸恨易生病中催坐起傾側若為情

滿城道中

十二西郎縹緲中顏行壁立插晴空欲攜天地諸山去

金瓶梅詞話卷十四  
不逐秦鞭過海東

抱陽寺

孱顏蒼玉抱幽邨  
突兀雙龍窟宅尊  
回首萬山東盡處  
冷煙平遠半乾坤

九日郭外二首

溪上蒼煙一道開  
誰家日夕採菱回  
片帆不舉波間過  
無限好山波底來

萋萋宿草暗荒丘  
落日徘徊上上頭  
一曲悲歌天地窄

怪人獨鳥入長楸

蠶

作繭纔成便棄捐可憐辛苦為誰寒不如蛛腹長絲滿  
連結朱簷與畫闌

龍德故宮懷古八首

國是當時總是非強將商鞅作皋夔莫言天變渾無畏  
不見雷轟黨籍碑

蔡京姦計假荆公紹述雖同事豈同不向嶺南消禍本

更從海上立奇功

人間未省有金國地底唯知幸鐵樓忽見城頭鷓鴣舞  
賣花聲斷不勝愁

復國誅讎事豈難背城借一據河山汴梁更不回頭望  
直送汪黃到浙間

少康一旅便南奔畀付英雄國可存宗澤云亡李綱罷  
衣冠不復到中原

却許邦昌為紀信渾將秦檜作程嬰甘心江左成東晉

長使英雄氣不平

金人不敢駐幽燕劉豫猶令帝八年若守汴梁和且戰  
關河一半尚能全

建炎新焰起江東冤血青城尚幾重閩越兩王還有後  
天教太祖繼高宗

帥正堂

秋渚芙蓉澹澹香新亭爽氣釀新涼晚風吹斷溪南雨  
一片金煙挂夕陽

長蘆舟中遇風二首

海風栗栗刮鯨涎，吹裂西南一半天。  
暝色忽開隨酒散，浪花和月上船舷。

杯盤楚楚下中流，風順帆輕莫靄收。  
忽憶黃河車轉斂，日翠綃涼月轉船頭。

贈漁者

一尺新魴綠柳穿，漁人饋我不論錢。  
斫開細雪銀膏瑩，旋折黃蘆蕪晚煙。

寓目

錯莫坤靈慘不春  
搶攘戈戟鬧風塵  
可憐萬里中原土  
一段荆榛愁殺人

宿黃陂縣南

茅屋敲斜竹  
逕荒稻畦殘  
水入方塘管  
屯未定斜陽下  
鴈點秋煙不著行

燭花

江城深夜作輕寒  
金粟堆盤蠟炬殘  
應是燈花憐久客

故隨人意報平安

正月三日見月

小雪初晴卯色天  
虛庭搖曳動江煙  
忽聞歸鴈驚回首  
新月梅梢又一年

八月十六日曉起見月

冷雲收盡月當西  
過却秋宵已失期  
何事天公太相妒  
只教人看不圓時

橄欖



半青來子味難誇  
宜著山僧點蠟茶  
若是黨家金帳底  
只將金橘送流霞

丁卯新館寒食無花二首

四圍擊柝鎖重扉  
春去春來總不知  
腸斷東城中酒後  
春衫走馬拂花枝

陽和渾不到空齋  
深院無人長綠苔  
為報監門暫開鎖  
少分春色入門來

館內幽懷

狂花野蔓滿疎籬恨殺絲瓜結子稀獨立無言解蛛網  
放他蝴蝶一隻飛

夢遊木香洞府

月窻青錦麝塵寒夢遶煙條露蕊看但覺身輕似蝴蝶  
種香風物異槐安

莫春

重圍雨久塌蒼苔火鋪喧呼著棘栽唯有東風難禁約  
隔牆吹過落花來

同闕彥舉南湖晚步

荷花臨水殿綺月轉簾腰晚吹動銀管莫涼生翠綃

促織

亂聒霜前夜忙催機上秋無衣汝何益重作旅人愁

太平頂讀秦碑

岱宗太平頂磨崖與天齊左列則天頌右刻張說辭文  
采與書法不離近代規漢封宛在周觀東秦壇負出絕  
頂西壇前圓平值中峰突兀上有始皇碑年深雨漬百

裂餘析作兩峰蹲半規面陽數字仍可辨隙縫重銜苔  
蘚皮中間隱約見制可完好可辨惟臣斯拳如釵股直  
如筋屈鐵碾玉秀且奇千年瘦勁益飛動迴視諸家肥  
更癡當時風雨有餘怒豈容夸石獨在茲祇應神明愛  
文物不肯轟擊常護持昔年韓文公曾賦岫嶠詩字青  
石赤皆傳聞漫為咨嗟涕漣何如親登泰山日觀峰  
光怪特見絳氣纏金虹摩挲細讀秦相碑天門高咏來  
清風乃知山靈不相負夜宿天邊不忍去醉倚雲窻重

回顧

和陶咏荆軻

燕國八百里最為遠秦嬴可作殷周基何乃事荆卿癡  
兒強復讎匕首堪咸京徑刎於期首更圖督亢行倉皇  
事不就狼籍斷冠纓寒風死別歌睥睨一世英不若專  
設諸飲恨復吞聲縱使殺一秦寧無一秦生呂政方忘  
燕忽作繞柱驚并吞勢不已舉兵復有名埽平黃金臺  
故鼎入秦庭昔我渡易水晚登燕子城投文弔田疇思

賢重屏營舉事本道義不係敗與成為國恃刺客夫豈  
豪英情

儀真館中雜題五首

心事悠悠逐去鴻夢魂渺渺入西風無邊木葉無窮恨  
一夜秋容滿鏡中

鞍馬怱怱改館來芙蓉開罷海棠開梁間笑殺新來燕  
去了重來尚未回

花落深庭日正長蜂何撩亂蝶何忙匡牀不下凝塵滿

消盡年光一炷香

持節江頭久食魚  
館人供鴈意踟躕  
呼兒細看雲間足  
恐有中原問訊書

只見星簾挂月鉤  
銀河依舊隔牽牛  
遙憐玉雪佳兒女  
淚滿西風乞巧樓



元詩選初集卷十四